

1 Peter

Roube'aten Ana Tur

Peter ana fef wantoro'ot kirum kirisiyan sabuw wabih te'afa'af, "God ana Roubinenayan sabuw" iyab earusabuy Asia Minor veya ere'erene tema'am isah. Iti fef kikirum ana an gagamin i baiyabayah tafah fair eya'iy, iyab bai'akir wanawanan terur naatu hai baitumatum isan tebi'akir. Kirumayan iti fef kirum baiyabayah hai not ekukusib Jesu Keriso ana Tur Gewasin isan, i ana morob, ana misir naatu oman enan i boro nuhifot nitih. Iti boun ana marakaw i hinibasit hinab naatu hai bai'akir wanawanan hinarun nawenabih, i hai baitumatum gewasin isan efufufun hinafair hinabat, naatu i boro baiyan hinitih hinab Jesu Keriso nabirerereb anamar.

Hai yare anaveya i hai koufair ebitih men ebihamiyih, naatu kirumayan ana baiyabayah isah tur fokarinaka u'uwich i Keriso nowan orot babin hai ma'abe hinama.

Fef Wanawanan Iti Na'atube Hi'asgidigid

Roube'aten 1.1-2

Tenaya God ana yawas isan (1.3-12)

Foyab inatarakair inan kakafiyinamaim inama (1.13-2.10)

Bai'akir ana veya kirisiyan hai bowabow boro mi'itube hinabow (2.11-4.19)

Kirisiyan hai yara'iyen naatu hai bowabow (5.1-11)

Yomanin (5.12-1)

Peter Fef Kirum Ana Ofonah Kirisiyan Sabuw Isah

1 ¹Ayu Peter Jesu Keriso ana tur abarayan, kwa isa a fef akikirum, God ana roubinen sabuw naatu touman sabuw na'atube earuwsabuy kwatit nanabin Pontus, Galasia, Capadosia na naatu Asia, Bitiniya wanawanan kwa ma'am. ^{2a}Kwa

^a 1.2 Rom 8.29; 2Th 2.13

i Tamat God ana kokomaim rubiniy naatu i ana Anun Kakafiyinamaim kwa iwani i ana sabuw kakafiyin kwamatar. Jesu Keriso kwanabosiyasiyar naatu i ana rara'amaim nakusouwi uhew kwana matar. Karam kwa biyane, manaw kabeber naatu tufuw naya'abar nara'at.

Kirisiyan Hai Yawas

³God wabin tanabora'ah it ata Regah Jesu Keriso Tamah. Anayabin it isat ana baiwanbabanen i ra'at, Jesu Keriso morobone mimisir imaim yawas boubun itit. Imih it abistan isan tanotanot i nuhifot tama'am. ⁴^bImih it au nat tananuw God ana baigegewasin totobuyoy ana sabuw isah maramaim ya ti'inu'in tanabow. Nati sawar boro men hinamun, men hina'af, naatu men hinakusaisirih. ⁵^cIti sawar i kwa isa, baitumatumamaim God ana fairamaim tafafar yawas bait isan God yabuna yomaninamaim nabow natit hinirerereb.

⁶^dIti isan kwa boro gagaminaka kwaniyasisir, baise anotanot mar kikimin boro kwanibiyababan, anayabin kwa boro yare ta ta wanawanan kwanarun kwani'akir. ⁷^eSawar iti temamatar i kwa a baitumatum efufufun, saise kwa a baitumatum boro narusouw niturobe. Routobon iti na'atube emamatar i *gold* te'afun terurubunai ana gewasin tebaib na'atube. Baise, kwa a baitumatum ana gewasin i ra'at *gold* natabir. Imih a baitumatum wainaben wanawanan narun fair nabaib ufunamaim boro nanawiy bora'araten fair baifa'en nit, Jesu Keriso nabirerereb ana veyama'im. ⁸^fBasit men kwa'i'itin baise isan kwabiyabow, men kwa'i'itin baise kwabitumatum. Naatu iti yasisir i igewasin kwanekwan, men karam boro isan tanao taniduduramih. ⁹Anayabin ayub ana yawas bain isan ana ef i baitumatum akisin.

¹⁰^gDinab oro'orot afa manaw kabeber God nabit isan hio kwanowar naatu nati yawas ana'an isan hamenamo yatehneb erekakaf hinuwet men kafaita. ¹¹^hImih i tita'urin isan hinuwet mar biy boro namatar naatu boro mi'tube namatar. Keriso Anuninimaim dinab oro'orot iwanih hai tur eowen, Keriso nabi'akir ufunamaim wabin gagamin hinifai hinabora'arah. ¹²God ana dinab oro'orot isah irerereb abistan i hisisinaf i men taiyuwih isah hibowabowamih baise i kwa isa hibow. Naatu sawar abisa inu'in kob abarayah tur gewasin hibai hina boun hiorereb kwanonowar. I Anun Kakafiyin marane hiyafar re'ere ana fairamaim kwa isa hibinan kwanonowar. Naatu iti sawar isah tounamatar auman tekokok kwanekwan hinaso'ob.

^b 1.4 Col 1.12 ^c 1.5 Jn 10.28; 17.11 ^d 1.6 Jas 1.2; 1Pet 5.10 ^e 1.7 Pro 17.3; Zec 13.9; Mal 3.3; Jas 1.3 ^f 1.8 Jn 20.29; 2Cor 5.7 ^g 1.10 Mat 13.16-17 ^h 1.11 Psa 22; Isa 53; Luk 24.26-27

Yawas Kakafiyinamaim Kwanama

¹³Isan imih a not kwabogaigiwas bai'a'it isan, matatoniwa'anⁱ kwa anuhifot anababatun baigegewasinamaim kwanayai, ana maramaim Jesu Keriso nabirerereb kwa boro nit kwanab. ¹⁴JKwa i fanabow kek na'atube men kakafin ana naniyanamaim kwa ayawas nabonawiy marasika kwama'am na'atube kwanama'amih. ¹⁵Baise nati efanin God kwa eafi i kakafiyin, imih mar etei asinafumaim kakafiyi kwanama. ¹⁶^kBuk Atamaninamaim eo, "Kwa etei i kakafiyinamaim kwanama, anayabin ayu i kakafiyinamaim ama'am."

¹⁷God kwa Tamat kwarouw isan kwayoyoban, i sabuw etei hai bowabowamaim efufuni^m naatu men yait ta oukoun ebatabat. Kwa i nanawan sabuw na'atube iti tafaramaim kwama'am, imih God isan kwanabir. Isan imih mar etei a bowabowamaim God isan kakaf nama. Kwa a yawas tutufin iti tafaramamaim kwanama. ¹⁸Anayabin kwa kwaso'ob, kwa a'a'agir hai yawas kakafin hiyabunibun ra'iy na, ine Keriso kwa tubuni botaiti. Iti men boun *gold* o *silver* biyan ana gewasin ekukusaisir na'atube. ¹⁹ⁿBaise Keriso ana rara uhew bitan *lamb*, boubun biyan gewasin aurin feher en imaim tubunit. ²⁰^oTafaram matara'e ana vey a God Keriso rubin, kwa baiyawasi isan naatu boun iti yomaninamaim kwa isa irerereb kwa'i'itin. ²¹^pI wanawananamaim kwa God kwaitumitum, morobone i yawas misir naatu aiwob God itin. Imih kwa a baitumatum naatu a nuhifot God wanawananamaim ema'am.

²²^qKwa i boun turobe kwabobosiyasiyaramaim kusouwi uhew kwamatar, imih a yabow a'ofonah isah i gewasin maiyow, dogor babanika a'ofonah isah kwaniyabuwi. ²³Anayabin kwa i God ana tur yawasin naatu wanatowanin kwanonowar imaim yawas boubun kwabai maiye. Ana'itinin iti tur i ub yawasin kwabai men murubin ana ubamih, baise wanatowan ana ub kwabai boro nama wanatowan. ²⁴^rBuk Atamaninamaim eo,

"Orot babin i fotan na'atube.

Naatu ana mokob i boun sigar beran na'atube.

Beran nakekerer boro naha'obow nara'iy.

²⁵ Baise Regah ana tur ikwah sawar nama wanatowan."

Nati tur i tur Gewasin kwa isa hibinan kwanowaraka.

ⁱ 1.13 ayawas kwanarumutufur ^j 1.14 Rom 12.2; Eph 2.3; 4.17-18 ^k 1.16 Lev 11.44-45; Mat 5.48 ^l 1.17 Rom 2.11; Rev 2.23 ^m 1.17 ebibatiyih ⁿ 1.19 Act 20.28; Heb 9.12-14 ^o 1.20 Eph 1.4; 2Tim 1.9-10 ^p 1.21 Jn 14.6; Rom 5.1-2 ^q 1.22 Jn 13.34; Rom 12.10 ^r 1.24-25 Isa 40.6-8

Kabay Yawasin Naatu Tafaram Kakafiin

2 ^{1s}Isan imih yawas kakafih boro kwanihamiyen. Men kwanifuwen, men awa hinaharewan, men kwanibobowen, men turanah isah tur kakafin kwanao. ²Kek sosof na'atube kwanamatar, mar etei sika namamah ayub ananun tom isan, saise i kwanatomatom kwa ayawas boro nara'at nayan. ³Buk Atamaninamaim hi'o hikirum, "Kwa taiyuw ayawasamaim kwaso'ob Regah i kabeberayan." ⁴Kwana ata Regah biyanaika kwanama, iti kabay yawasin sabuw hi'itin hikwahir yabin en hirouw, baise God rubin na mokob foun matar. ^{5u}Kwa baitumatumayah i wabat wanatowanin na'atube, imaim God bai ayub ana Tafaror Bar ewowowab. Kwa auman i firis ana kou'ay ayubitane ana sibor kwaya'ay. Jesu Keriso ana baibaisamaim, God i iyasisir ebaib. ^{6v}Buk Atamaninamaim iti na'atube hikirum,

"Kwa'itin, ayu agim gewasin arubin,
i Zion tafanamaim ayai,
agim etei hai ukwarin matar,
naatu yait nabitumitum boro men biyan na'ohow."

^{7w}Kwa iyab kwabitumitum, Keriso i kabay gewasin kwa isa, baise kwa iyab men kwabitumitum isa boro men gewasin.

"Naatu bar wowabayah kabay hi'itin yabin en hirouw hikwahir inu'in,
ina kabay etei hai ukwarin matar.

^{8x}Naatu ibanak Buk Atamaninamaim hikirum hio,

"Nati kabay i boun sabuw koun hiyen tere'ere,
naatu to ah yow tere'ere."

Anayabin Tur Gewasin men hinowar, imih God ana kok yayakikifut isah emamatar.

^{9y}Baise kwa i God ana rubinen sabuw, kwa i firis gewas, God ana sabuw kakafiin, naatu God nowan, imih God ana bowabow gewasin kwanaorereb, anayabin guguminamaim kwama'am botaiti kwatit marakaw bonamanamarin gewasin kwabai. ^{10z}Marasika kwa men God ana sabuw, baise boun kwa i ana sabuw. Marasika God ana kabeber men kwabai, baise boun i ana kabeber kwabai.

God Ana Akir Wairafih

^{11a}Are au ofonah, kwa au'uwi kwa i nanawan naatu touman sabuw na'atube iti tafaramaim kwama'am! Men biya ana kok nabonawiyi imaim nakaifi. Nati biya ana kok i boun rakit na'atube, boro ayub hairi hiniyow.

^s 2.1 Eph 4.22; Jas 1.21 ^t 2.3 Psa 34.8 ^u 2.5 Eph 2.21-22; Rev 1.6 ^v 2.6 Isa 28.16; Eph 2.20 ^w 2.7 Psa 118.22 ^x 2.8 Isa 8.14 ^y 2.9 Deu 7.6; 14.2; Isa 9.2; Act 26.18; Eph 5.8
^z 2.10 Hos 2.23 ^a 2.11 Gal 5.17, 24

¹² ^bEteni Sabuw matahimaim kwanakaifi gewas kwanama. Kwa isa boro bowabow kakafih sinafuyah hinarauw hinao, baise anamaramaim bowabow gewasin kwanasisinaf boro men isa tur ta hinao. Imih Baibatebat ana Veya God namamatabir. Kwa isa boro God ana merar hina hinabora'ara'ah.

¹³ ^cRegah wabinamaim kwa kwayar'iy sabuw gagamih babahimaim kwanama. Gawan hai aiwob gagamin aiwob etei ukwarih, ¹⁴ gawan sabuw iyab gawan ana ukwarin iyafarih hitit tafaram ta ta tekakaif, imih iyab bowabow kakafin tesisinaf boro hinabow baimakiy hinitih, baise iyab bowabow gewasin tesisinaf boro hinabora'ara'ahih. ¹⁵ ^dGod ekokok kwa kwanasinaf gewas saife nati sabuw hai not meyemeye, boro hinanutanubamo hinama, aurih ef men ema'am boro isa tur kakafih hinao. ¹⁶ Kwa ama i sabuw roufamen na'atube kwanama, baise men nati roufamen ana yawasamaim kwama'am isan afair kwanab kakafin kwanasinaf, baise kwa i God ana'akir wairafihibe kwanama. ¹⁷ ^eSabuw etei isah kwanakakaf. A ofonah baitumatumayah isah kwaniyabow kwanakakaf. Naatu aiwob hai ukwarin isan kwanakakaf.

¹⁸ ^fKwa akir wairafi kakafemaim kwanayara'iy, a orot ukwarih fanah kwanab babahimaim kwanama, men gewasin isa isisinaf akisin fanah kwanab, baise iyab fokarin isa tisisinaf auman fanah kwanab. ¹⁹ Kwa anot tutufin etei God ana kokomaim kwabowabow naatu sabuw asir biyababan hinit nawawainabi isan, God boro nigegewasini. ²⁰ ^gBo kakafin kwasisinaf isan hinarab nawawainabi ana gewasin boro abisa kwanab, baise gewasin kwanasinaf isan nawainabi kwabi'akir God boro nigegewasini. ²¹ ^hKwa afa'af kwabai i bai'akir isan, anayabin Keriso kwa isa i'akir ana bai'obaiyen yare saise i an efanin kwani'ufunun.

²² ⁱ"Bowabow kakafin men ta sinaf,

naatu awanamaim men baifuwen tur ta eomih."

²³ ^jHibi'i'iyab ana maramaim i men kafa'imo bai'iyab tur ta wan yi isah eomih, i bi'akir ana veya men hibiruwimih, baise ana nuhifot i God mutufor baibatiyenayan imaim yai. ²⁴ ^kKeriso akisinamo ata kakafih i biyanamaim eabar onaf afe'enamaim yen, saise it bowabow kakafinane tanamorob naatu yawas mutuforomaim tanama, i ana fitamaim it iyawasit. ²⁵ ^lAnayabin kwa bobaituw *sheep* na'atube ef kwasa'ir nanabin kwan, baise boun kwa buwi kwamatabir kwana Nabatanenayan naatu anun ana kaifenayan biyan kwatit.

^b 2.12 Mat 5.16 ^c 2.13 Tit 3.1 ^d 2.15 1Pet 3.16 ^e 2.17 Rom 12.10 ^f 2.18 Eph 6.5

^g 2.20 1Pet 3.14, 17 ^h 2.21 Mat 16.24; Jn 13.15 ⁱ 2.22 Isa 53.9 ^j 2.23 Isa 53.7; 1Pet 3.9 ^k 2.24 Isa 53.5-6; Rom 6.11 ^l 2.25 Ezk 34.5-6; Mat 9.36; Jn 10.14; Heb 13.20-21

Kirisiyan Baibin Naatu Oro'orot A'awah Bairi

3 ^{1m}Baibin, a'aaw oro'orot fanah kwanab kwanayara'iyi babahimaim kwanama, saise a'aaw oro'orot God ana tur gewasin men nabitumitum boro kwa ayawas gewasinamaim dogoron kwanikitabir hinan baitumatumayah hinamatar. Men kwa a turamaim baise kwa a yawas ana itininamaim. ²Anayabin kwa ayawas ana itinin i uhewbitan. ³ⁿKwa baibin men taiyuw biya ufunane ana itininamaim kwaniwa'an kwanan sa'er kwanamatar, arib a baisuwaramaim, tain tenasour o debad ya'amaim, o faifuw osenamaim. Nati sa'er boro men nama manin. ⁴Baise nati efanin, kwa a yawas wanawanan ana sa'er hina'i'itin i tufuw nuwarob naatu yara'iyen. Sa'er iti na'atube God i'itin i ra'at naatu igewasin kwanekwan. ⁵Marasika baibin iyab kakafiyinamaim hima'am, i hai nuhifot God biyanamaim hiyei sa'er himatar, anayabin i a'awah oro'orot babahimaim hima. ^{6o}Babin Sarah i nati na'atube ma, Abraham fanan bosiyasiyar naatu ana regah rouw eaf. Kwa i Sarah natunatun, kwa gewasin kwanasisinaf na'at, boro men abisa ta isan kwanabir. ^{7p}Kwa oro'orot auman a'aaw baibin kwanasu'ubih gewas bairi kwanama, baibin i ririmih men boun kwa fair kwabai kwama'am na'atube. Isah sinafumih erekakaf kwanasinaf, anayabin wanatowan ana siwar God nabit, i auman boro bairi nafarami. Nati na'atube kwanasisinaf ayoyobanamaim boro men sawar ta a ef nahirimih.

Gewasin Inasisinaf Isan Boro Ini'akir

⁸Abistan anotanot yomaninamaim anao kwananowar auman anisawar. Kwa turanah bairi anot ta'imon, ananiyan ta'imon; sabuw bairi kwaniyabow tait ruburub na'atube, naatu turanah isah kwanayara'iyi naatu kwananot yawananih. ⁹Tur kakafin hina'u'uwi o hina'oraraifi men wan kwanay, baise nati efanin baigegewasinamaim wan kwanay, anayabin baigegewasin i God eomatani boro nit ana maramaim kwa na'a'afi. ^{10q}Anayabin Buk Atamaninamaim iti na'atube hikirum hi'o, "Yait ekokok yawas niyasisir.

naatu yait ekokok veyawasin na'itin
menanamaim men kakafin nao,
naatu ufurinamaim men baifufuwen tur natit.

¹¹Sinaf kakafin nihamiyen natatabir gewasin nasinaf,
naatu tufuw isan hinitafofor dogoron tutufin etei.

¹²Anayabin sabuw hai yawas mutufurin Regah ekakaifih,
naatu hai yoyoban isan tainin fa'iwa'an ma erubirub,
baise sabuw iyab kakafin tisisinaf Regah i kaun ebitih."

^m 3.1 Eph 5.22 ⁿ 3.3 1Tim 2.9 ^o 3.6 Gen 18.12 ^p 3.7 Eph 5.25 ^q 3.10-12 Psa 34.12-16

¹³Bowabow gewasin kwanasisinaf isan yait boro kwa ni'a'afiyi naborabirabi? ¹⁴Baise gewasin kwasisinaf isan kwanabi'akir, kwa i boro baigegewasin kwanab, imih men yait ta isan kwanabir naatu kwaniyababan. ¹⁵Baise Keriso isan yatenanub dogor tutufin etei kwanab naatu Regah na'atube isan kwanakakafiy kwanakwafir.

Mar etei bobuna'amaim kwanama. Sabuw afa kwa nuhifot kwabai kwama'am isan hinabibatiyi, kwanakubuna hinanowar. ¹⁶Baise sabuw isah yara'iyen naatu kakafemaim kwanasinaf. A not gewasinamaim iu'uwi mar etei imaim kwanasinaf, saise ubar hinabit ana maramaim sabuw iyab Keriso ana gewasin isan tur kakafih hina'u'ui boro hai tur isan biyah na'ohow. ¹⁷Anayabin God ana kok gewasin kwanasisinaf isan kwanabi'akir, i gewasin maiyow, naatu kakafin kwanasisinaf isan kwanabi'akir i men gewasin. ¹⁸Anayabin sabuw etei hai kakafin isan Keriso mar ta'imon morob, sabuw gewasih naatu sabuw kakafih isah, saise tabonawiyit tatan God nanamaim tatatit. Biyan i morob, baise ayubin i yawasin. ¹⁹Naatu Anunin na sabuw murubih ayubih ana diburamaim hiya hima'am isah binan. ²⁰Iti sabuw i Noah ana wa^u wowowab ana vey, ayubihine God fanan hisair, baise God yaten nub ma sabuw etei *eight* buwih wa wanawanan hirun gis yey ana vey, harew wanane tafafarih hima. ²¹Naatu iti harew i bapataito ana i'inanen boun imaim kwa iyawasi. Men biya kato ekukusouw, baise not gewasin iuwi God kwa'o'omatan isan. Jesu Keriso morobone mimisir imaim kwa iyawasi. ²²Naatu yen au mar naatu God ana asukwafune mare ema'am, tounamatar etei naatu mar hai fair hai roubabaruwen etei i babanamaim ebobonawiyih.

A Yawas Kwanabotabir

4 ¹Isan imih Keriso i biyanamaim biyababan bai morob, imih not nati ta'imonamaim kwanabogaigiwas biya nababan, anayabin orot biyan baban ebi'akir^w bowabow kakafin i biyanamaim boro na'afuw. ²Naatu ana ma nati'imaim nabubusuruf boro men biyan ana kokomaim nabonawiy nama'amih, baise boro God ana kokomaim nama. ³^xAnayabin kwa vey manin maiyow Eteni Sabuw hai ma na'atube kwama, ayawas etei i kwabisesebar kwanekwan, baiwa'an isan kukura'ara'hi, kwatomatom kwanekwan, ben kawasa wanawanan kwatom kwararowabon, hiyuw kakafih wanawanan kwasisinaf kwanekwan, naatu hai kwafiren kakafih wanawanan kwaikofanib bairi kwakwafir. ⁴Turobe kwa a'ofonah bairi marasika kwabita'ay i tibifofor men kafaita, anayabin abisa kakafin tisisinaf kwabikofanib isan tur kakafih

^r 3.14 Isa 8.12-13; Mat 5.10; 1Pet 2.20; 4.14 ^s 3.16 1Pet 2.12 ^t 3.20 Gen 6-7

^u 3.20 Ark ^v 4.1 Rom 6.2, 7 ^w 4.1 emomorob ^x 4.3 Eph 2.2-3

maiyow ti'u'ui. ⁵ Baise kwanaso'ob, God sabuw etei boro nibabatiyih, sabuw yawayawasih naatu murumurubih etei. Imih i boro God nanamaim hinabat nabibatiyih hiniya futifut. ⁶ Ana'an iti isan tur gewasin hibinan, naatu murumurubih auman isah hibinan. Saise biyahine bai'akir hibai himomorob, ayubihine boro yawasih God bairi hinama.

God Ana Siwar Kaifenayah Gewasih

⁷ Tafaram ana yomanin i na iyubin. Isan imih anot etei naruboun kwanayamutufuri gewas kwanayoyoban. ⁸ Sawar etei tafahimaim, a yabow dogor babanika taituwa bairi kwaniyabowbonen, anayabin yabow i bowabow kakafih etei esusuma'ay. ⁹ A bar etawan kwanabotawiy a ofonah isah, eremerarayow men eregamin. ¹⁰ Kwa ta'ita'imon God biyanane a siwar ta ta kwabaib, i kwanakaif gewas, taituwa kwanibaisih, saise God ana gewasin kwa wanawanane natit sabuw hina'itin. ¹¹ O yait tur o isan ana siwar ibaib, tur inao ana'itinin i God o wanawanamaim eo, o yait baibais ana siwar ibaib, God ana fair bitimaim inabow, saise o a bowabow nati'imaim God boro merarayow hinitin Jesu Keriso wabinamaim. Fair, marakaw i akisinamo isan nama wanatowan, wanatowan. *Amen.*

Kirisiyan Ana Bowabow Isan Kwani'akir

¹² Are au ofonah,^d men kwana'oror iti routobon kakafin wanawanan kwarun e'a'arahih isan, ana'itin boun sawar asir isa emamatar na'atube. ¹³ En baise, kwaniyasisir, kwa i Keriso ana bai'akir turin kwabaib, saise i ana fair bonamanamarin nabirerereb anamaramaim kwa boro dogor yasisir awan nakaratan. ¹⁴ Keriso wabinamaim sabuw tur kakafih hinao hinabi'a'afiyi boro baigegewasin kwanab, anayabin Ayubin gewagewasin, God Anun Kakafiyin i kwa tafa mara'at ema'am. ¹⁵ Kwai'akir biya ebababan i men sabuw kwa'a'asbunubunuw, o kwababain isan, kakafih kwasisinaf isan, o sabuw hai wau kwayiy isan. ¹⁶ En baise kwai'akir biya ebababan, anayabin kwa i Kirisiyan sabuw, imih men biya na'ohow, baise God kwanabora'ara'ah ana merar kwanay, bai'akir nati na'atube wabinamaim kwabaib isan. ¹⁷ Baibatebat ana vey i etitit, naatu God natunatun i boro wan nibabatiyih. Naatu it Kirisiyan sabuw auman boro nibabatiyit, baise sabuw iyab God ana Tur Gewasin men hibitumatum yomaninamaim isah boro abisa namatar? ¹⁸ Buk Atamaninamaim eo, "Sabuw gewasih yawas bain isan isah nafofokar na'at, Sabuw God men hisusu'ub naatu kakafih sinafuyah isah boro abisa namatar?"

^y 4.5 Act 10.42 ^z 4.7 Rom 13.11-12 ^a 4.8 1Pet 1.22 ^b 4.9 Heb 13.2 ^c 4.10-11 Rom 12.6-8 ^d 4.12 au yabow sabuw ^e 4.13 Act 5.41; Jas 1.2; 1Pet 1.6-7 ^f 4.14 1Pet 2.20
^g 4.18 Pro 11.31

¹⁹Isan imih sabuw iyab God ana kokomaim tibi'akir, hai sinaf gewasinamaim God hai Baimatarenayan hinitumitum, anayabin God ana omatanen i mar etei esinaf tibiturobe.

Bonawiyenayan God Ana Sabuw Kwanakaifih

5 ¹Ayu auman i bonawiyenayan orot ta naatu Keriso hirab hi'a'akir momorob ana sifrubonayan ta. Naatu Keriso ana marakaw nabirereb ayu boro au nowau turin anab. Kwa^h bonawiyenayah ekaleisia wanawanahimaim tur fokarin ao abifefeyani. ²ⁱGod ana^j bobaituw babamaim tema'am kwanakaifih gewas, dogor tutufin etei, men erebaifut kwanakaifen, baise God ekokok na'atube. Men kwananot nati bowabowamaim kwa boro a kabay kwanab, en baise a naniyan tutufin etei i God isan nakura'ara'ahi kwanabow. ³^kSabuw babamaim hima kwakakaifen men a baiyonayonayah hinamatar, baise kwa a bowabowamaim i hina'itin hini'u'uri. ⁴Naatu bobaituw kaifenayan ukwarin nanan anamaramaim, kwa boro a kowas bonamanamarin nit, naatu i ana marakawin boro men namabiyamih.

⁵^lOrot boub auman au'uwi, regaregah ai'in fanah kwanab.^m Kwa etei'imak, yara'iyen ana faifuw kwana'us turanah bairi kwanibaibaisbonen kwanabow. Anayabin Buk Atamaninamaim iti na'atube eo,

“Sabuw bai'o'orotoyah God men ekokok,
baise sabuw iyab teyayara'iyih God i ebibaisih.”

⁶ⁿImih kwanayara'iyi God uman fairin babanamaim kwanama, saise i ana vey a gewasin nabaib ana maramaim kwa boro nabora'ahi kwanayen. ⁷^oA yababan etei God umanamaim kwaihamiyen, anayabin kwa i mar etei ana kaifen babanamaim kwama'am.

⁸^pMata toniwa'an taiyuw a ef kwana'itin gewas. Kwa a rakit orot Demon Kakafin *lion* na'atube garan nuwet ereremor orot babin ta yubin tarsisibin aanin isan. ⁹^qBaise kwanarukouw, naatu a baitumatum tafanamaim kwanabatkikin, anayabin kwa kwaso'ob tafaram wanawanan taituwa baitumatumayah etei i bai'akir ta'imon wanawanan kwarun kwanan.

¹⁰Baise mar kafai kwanabi'akir ufunamaim, manaw kabeber ana God Keriso wanawananamaim ana marakaw wanatowanin bairi faram isan ea'afi boro nabobuna'i, nawowabfuti, fair nit, naatu kwanabatkikin.

¹¹Nati i anababatun. God isan fair ema'am wanatowan, wanatowan *Amen*.

^h 5.1 regaregah ai'in ⁱ 5.2 Jn 21.15-17; Act 20.28 ^j 5.2 Sabuw ^k 5.3 2Cor 1.24; Php 3.17; Tit 2.7 ^l 5.5 Pro 3.34; Eph 5.21; Jas 4.6 ^m 5.5 babahimaim kwanama. ⁿ 5.6 Mat 23.12; Luk 14.11; Jas 4.10 ^o 5.7 Mat 6.25-30 ^p 5.8 1Th 5.6 ^q 5.9 Eph 6.11-13; Jas 4.7

Merarayow Yomanin

¹² Silas^s ana baibaisamaim ayu iti fef kabumin akirum kwa isa abiyafar, Silas i ana merar ayiy, bosunusunubayan orot gewasin. Ayu iti fef akikirum ana'an i akokok kwa tafa fair anayai naatu a tur ana'owen kwanaso'ob manaw kabeber Godane, i kwa wanawananamaim ma ebibaisi, imih i tafanamaim kwanabatkikin. ¹³ Babilon ekaleisia kwa rubu na'atube kwa bairi roubinen kwabaib a merar tiyiy, naatu ayu natu Mark auman a merar eyiy. ¹⁴ Yabow ana efamaim kwanimerarayowbonen kwanimamayen kwanama. Kwa iyab Keriso wanawananamaim kwama'am etei isa tufuw nama. *Amen.*

^r 5.12 Act 12.2, 25; 13.13; 15.22, 37-40 ^s 5.12 Greek i Silvanus. ^t 5.13 Act 12.2; 2Tim 4.11